

四庫全書

子部

欽定四庫全書

子部
圖書編卷二十八

九

詳校官中書臣孫衡

主事臣祁韻士覆勘

總校官進士臣朱鈐

校對官編修臣馬猶龍

謄錄監生臣紀大奎

繪圖監生臣梅用諄

欽定四庫全書

圖書編卷二十八

天圓地方圖


明 章潢 撰

古今言天地者不一方圓所以言其象玄黃所以言其色健順所以言其德覆載生成所以言其職卑高上下所以言其位動靜闔闢所以言其機陰陽剛柔輕清重濁所以言其氣與質也要之皆是也是故曰

月星辰莫非天水火土石莫非地故曰凡有氣皆天有形皆地然猶未免以二物分言之也其實天地一也天無形而地之上虛空皆天也地之中所以發生萬物皆天之氣也中庸曰天地之道可一言而盡其為物不貳則其生物不測至哉言乎善觀天地者須默識其所以為物不貳而後可雖然羲皇仰觀而俯察尼父上律而下襲豈徒求之天地乎哉凡今之人孰不戴天而履地也孰不圓晉而方足也盡心於崇

效卑法之道者幾何人哉噫嘻天地為物不貳也天
地人之道可一言而盡亦曰為物不貳也人惟反身
以求之則參贊位育之道即于此乎在

天 圓 地 方 圖



金史卷之八十一
卷二十八
黃帝曰地之為下否乎歧伯曰地為人之下大虛之中者也帝曰馮乎歧伯曰大氣舉之也

天體之運有常度而無停機非有體也因星之所附麗擬之為天之體耳觀夫星之昏在東者及曉則西墜昏所不見者至曉則東升東西轉運有以驗天體之左旋矣然而北天之星未嘗入地終夜可見其旋轉為甚窄窺之以管其間一星旋轉尤密不出管中者曰紐星紐星所在天體是為北極若南天之星雖

終夜不常見而其旋轉亦不遠知為南極之所在而南極亦不動南北二極為天體之管轄其猶門之樞車之軸與試以圓瓜譬之北極乃瓜頂聯蒂之所南極乃瓜末含花之所天之東西為最廣則比瓜之腰圍北極高而南極下故北極之傍雖旋轉而常在於天南極之側雖旋轉而不出於地此又可驗地在天內天如雞子地如內黃矣然天體極圓不類雞子乃取以為譬者非取其形之肖特以比天包地外而已

以今譬之天體如鞠內盛半水而浮板水上板譬則地也置物板上鞠雖外轉板豈常動乎物遠視之微近視則大當午之日如盤盂出沒之日如車輪豈非午日為遠耶或疑午日熱為近殊不知日久照則熱不可以遠近論也至於星度高升則密低垂則疎則天頂遠而四傍近固可知矣且天體圓如彈丸圓中心六合之的也周圍上下相距正等名曰天中從天中直上至天頂名嵩高地平不當天半地上天多地

下天少從地平之中直上自有天中之所或以為地平正當天半者蓋以周天三百六十五度餘四之一仰視為一半星宿周度可見故以地中就為天中而今以地中直以上自有天中之所者以日月之近大而遠小星之高密而低疎知之也然地平既在天半之下而仰觀止見周度之半者天遠似乎低地平與之相妨人目不可盡見也

古者以陽城為地中然非四海之中乃天頂之下以

為地也論四海之中則崑崙為天下地平最高處東則萬水流東西則萬水流西南北亦然其山距西海三萬餘距東海不及二萬里則天下之地多在地中以西地中之東則皆海也故四海之內不中於陽城中於四海者乃天空以北崑崙以西也若天之所覆通地與海而言中則中於陽城仰觀北極出地三十六度南極入地亦三十六度北至朔方則北極出地四五十度南極入地亦然南至二廣則出入之度三

十一又南至交廣則出入之度二十而已天地之遠
近非惟仰觀不同而寒暑晝夜表景亦皆差別舊歷
晝永極於六十刻晝短極於四十刻今授時歷以驗
於燕地稍偏北故其永至六十二刻短至三十八刻
蓋偏南則長短較少偏北則所較最多夏則所較漸
多夏日出寅入戌其地近北冬日出辰入申其地近
南日近北則夏晝長而北方尤長夏夜短而北方尤
短日近南則冬夜長而北方尤長冬晝短而北方尤

短而南方之晝夜長短則不較多也古者立八尺之表驗日景短長地中夏至午景在表北約一尺六寸地中冬至午景在北表約一丈三尺南至交廣北至鐵勒等處驗之景各不同然非特測之南北亦驗之東西帝堯分命羲和之官宅於四方是也然表用八尺似失之短至元辛巳用表四丈允為定法是故表短則景短差數難覺表長則景長差數易明而一寸千里之差終未足據若土圭者雖古有其制然陽城

地中已不無差若即八方偏地驗之實有不可准者
大抵偏東者早景疾而晚景遲午景先至偏西者早
景遲而晚景疾午景後期偏北者少其晝而景遲偏
南者多其晝而景疾蠻粵短景指南而子午反復則
又舛訛甚矣

天體周圍皆三百六十五度四分度之一徑一百二
十一度四分度之三凡一度為百分四分度之一即
百分中之二十五分也四分度之三即百分中七十

五分也天左旋東出地上西入地下動而不息一晝

一夜行三百六十六度四分度之一

緣日東行一度故天左旋三百

六十六度然後日復出於東方

地體徑二十四度者其後半之勢傾東南其西北之高不過一度郅雍謂水火土石合而為地今所謂徑二十四度乃土石之體耳土石之外水接於天皆為地體地之徑亦得一百三十一度四分度之三也兩極南北上下樞是也北高而南下自地上觀之北極

出地上三十五度有餘南極入地下亦三十五度有餘兩極之中皆去九十一度三分度之一謂之赤道橫絡天腹以紀二十八宿相距之度大抵兩極正徐晝夜循環斡旋天運自東而西分為四時寒暑所居南北之中是為天心中氣存焉其動有常不疾不徐以子陰陽所以和此後天之太極也先天之太極造天地於無形後天之太極運天地於有形其實非二極也

天地之道可一言而盡也其為物不貳則其生物不測天地之道博也厚也高也明也悠也久也今夫天斯昭昭之多及其無窮也日月星辰繫焉萬物覆焉今夫地一撮土之多及其廣厚載華嶽而不重振河海而不洩萬物載焉今夫山一卷石之多及其廣大草木生之禽獸居之寶藏興焉今夫水一勺之多及其不測鼃鼃蛟龍魚鼈生焉貨財殖焉

自古論天地孰有如中庸此章之親切最詳明哉

邵子曰天圓而地方天南高而北下是以望之如倚
蓋焉地東南下而西北高是以東南多水西北多山
也天覆地地載天天地相函故天上有地地上有天
邵子曰天何依依乎地地何附附乎天地自相依附
程子曰凡有氣莫非天凡有形莫非地 天地之中
理必相直則四邊常有空闕處空闕處如何地之下
豈無天今所謂地者特如天中一物爾如雲氣之聚
以其久而不散也故為對凡地動者只是氣動凡所

指地者只是土土亦一物爾不可言地更須要知坤
元承天是地之道也 天地動靜之理天圜則須轉動
地方則須安靜南北之位豈可不定所以定南北者
在坎離也坎離又不是人安排得來莫非自然也
天地之化一息不流疑其速也然寒暑之變甚漸
冬至之前天地閉塞可謂靜矣日月運行未嘗息也
則謂之不動可乎故曰動靜不可離 天主施成之
者地也 天地生物之氣象可見而不可言善觀於

此者必知道也 地氣不上騰則天氣不下降天氣
降而至於地地中生物者皆天氣也惟無成而代有
終者地之道也

致堂胡氏曰夫天非若地之有形也自地而上無非
天者昔人以積氣名其象以倚蓋名其形皆非知天
者莊周氏曰天之蒼蒼其正色邪言天無色也無色
則無聲無臭皆舉之矣日月星辰之繫乎天非若山
川草木之麗乎地也著明森列躔度行止氣機自運

莫使之然而然者無所託也若其有託則是以形相屬一麗乎形能無壞乎

朱子曰天運不息晝夜輟轉故地樞在中間使天有一息之停則地須陷下惟天運轉之急故凝結得許多渣滓在中間地者氣之渣滓也所以道輕清者為天重濁者為地 天包乎地天之氣又行乎地之中故橫渠云地對天不過 問天地之所以高深曰天只是氣非獨是高只今人在地上便只是如此高要

之連地下亦是天又云世間無一個物事大故地恁地大地只是氣之渣滓故厚而深也 問康節天地自相依附之說某以為此說與周子太極圖程子動靜無端陰陽無始之義一致非歷家所能窺測曰康節之言大體固如是矣然歷家之說亦須考之方見其細密處如禮記月令疏及晉天文志皆不可不讀也

西山真氏曰按楊倞註荀子有曰天無實形地之上

空虛者皆天也

按天圓地方人皆知之然天之圓者氣之運也固流
行于地之四周地之方者質之凝也實在天範圍之
內邵子謂天地自相依附程子謂地者特中天一物
朱子謂地者氣之渣滓俱為確論惟岐伯大氣舉之
一語則尤精也雖然乾統天坤順承天欲窮天地者
須窮天地之原如文中子所謂圓者動方者靜見天
地之心其果然歟

張子正蒙曰地物也天神也物無踰神之理顧有地
斯有天若其配然耳地有升降日有脩短地雖凝聚
不散之物然二氣升降其間相從而不已陽日上地
日降而下者虛也陽日降地日進而上者盈也此一
歲寒暑之候也至於一晝夜之盈虛升降則以海水
潮汐驗之為信然間有大小之差則繫日月朔望其
精相感

黃瑞曰此段地有升降日有脩短及證以海水潮汐

之候皆用舊說今考先儒皆謂地在天中水環地外
四遊升降不越三萬里春遊過東方五千里其下降
如其數秋遊過西方五千里其上升如其數夏遊在
南故日在其上冬遊過北故日在其南此冬夏晝夜
之長短因地有升降而然人處地上如在舟中但見
岸之移而不見舟之轉也至於論潮則謂天包水水
承地而一元之氣升降於太空之中地勢水力與元
氣相為升降氣升而地沉則海水溢上而為潮氣降

而地浮則海水縮而為汐一晝一夜陰陽之氣再升
再降故一日之間潮汐皆再其說與地有四遊相為
表裏然以渾天觀之天形斜倚半在地上北極出地
三十六度其南五十五度正當地之中又其南十二
度為夏至之日道天在地上最高故晝長又其南二
十四度為春秋分之日道天在地上稍低故晝夜平
又其南二十四度為冬至之日道天在地上最低故
晝短其南下入地纔三十一度而已此晝夜長短乃

天體高低自然之理非因地之升降也潮汐消長則
惟余襄公海潮圖序最明蓋潮之消息皆繫於日月
臨卯酉則潮漲乎東西月臨子午則潮平乎南北晝
夜之運日行一度月行十三度有奇故太陰西沒之
期常緩於太陽六刻有奇潮信之來率亦如是自朔
至望常緩一夜潮自望至晦復緩一晝潮朔望前後
月行差疾故晦前三日潮勢長朔後三日潮勢大亦
如之月弦之際月行差遲故潮之出來勢亦稍小一

月則潮盛於朔望之後一歲則潮盛於春秋之中春
夏晝長潮常大秋冬夜長潮常大蓋歲之有春秋猶
月之有朔望天地之常數也此潮之消息乃繫之日
之進退亦非因地之浮沉也張子特用舊說而未之
易耳

吾人謂崑崙山乃天下之最高者其東面中原所以
江淮河漢之水皆東流其西面西域諸國所以流沙
以西之水皆西流南自吐蕃兩廣水皆南向北自沙

漢虎林以至海都木鉢地勢漸低水皆北向然此亦
舉其人力之所通者言之耳若以是為盡窺天地則
吾不知也蓋造化之妙無窮耳目之力有限以有限
窺無窮則有限者易窮而無窮者難限譬之蟻馬生
於穴長於穴游於牆屋聚於累土而曰牆屋足以盡
天累土足以盡地可乎異氏九天之說既成虛妄世
儒蠱測之言博而寡要蓋人生天地如魚在水而不
知有水是以日月之外聖人不能範圍之而作歷日

月之內聖人不能不損益之而成歲

天地二儀一也日月二曜一也陰陽二氣一也天統地日統月陽統陰元氣至明而純陽也精萃為日神運為天往來屈伸動靜為寒暑寒暑之交為四時一日之間有四時之候是以混沌開闢亦有四時之候四時一也混闢無窮而元氣不改也

天地一氣爾氣化生水水中滓濁積而成土土遂成山川土之剛者成石而金生焉土之柔者成木而火

生焉五行具萬物生而變化無窮矣

天地總論

易道乾一而實故以質言而曰大坤曰二虛故以量言而曰廣朱子謂此兩句說得極分曉蓋曰以形言之則天包地外地在天中所以說天之質大以理與氣言之則天之氣却在地之中地盡承受得天之氣所以說地之量廣天只是個物事一故實從裏面便實出來流行發生只是一個物事所以說乾一而實地

雖堅實然却虛天之氣流行乎地之中皆從裏面發出來所以說坤二而虛用之行地如肺形雖硬而中本虛故陽氣升降乎其中無所障礙雖金石也透過去地便承受得這氣發育萬物要之天形如一個鼓鞞天便是那個鞞外面皮殼子中間包得許多氣開闔消長所以說乾而一實地中間盡是這氣來往升降緣中間虛故容得這氣來往升降以其包得地所以說其質之大以其容得天之氣所以說其量之廣

非是說地之形有盡故以量言也只是說地盡容得天之氣所以說地之廣耳今歷家用律呂候氣其法最精氣之至也分寸不差便是這氣都只地中透出來如十一月冬至用黃鍾管距地九寸以葭灰實其中至之日氣至灰去晷刻不差

天空虛而其狀與雞卵相似地局定於天中則如雞卵中黃地之上下四圍蓋皆虛空處即天也地所以懸於虛空而亘古不墜者天行於外晝夜旋轉而無

一息停也天北高南下而斜倚故北極出地三十六度黃道周匝於天腹日月則行於虛空之中而晝夜不離黃道隋書謂日入水中妄也水由地中行不離乎地地之四表皆天安得有水謂水浮天載地尤妄也冬至之日晝則近南極而行在天之南方而陽氣去人甚遠故寒夜則潛於地底之虛空而陽氣正在人之足下所以井泉溫夏至之日晝則近北極而行正在人之頂上而陽氣直射於下故熱夜潛於地外

在北方之虛空處而陽不在地底所以井泉冷萬物
春而生夏而長由地底太陽之氣自下蒸上也秋而
收冬而藏由太陽之氣去地底以漸而遠也此理昭
然而昧者自不知耳

天外論

邵康節曰天何依依乎地地何附附乎天天地何所
依附曰自相依附自斯言一出宋儒標榜而互贊之
隨聲而妄行之朱子遂云天外更須有軀殼甚厚所

以固此氣也天豈有軀殼乎誰曾見之乎既自撰為
此說他日遂因而實之曰北海只挨著天殼邊過似
曾親見天殼矣自古論天文者宣夜周髀渾天之書
甘石洛下閎之流皆未嘗言非不言也實所不知也
若邵子朱子之言人所不言亦不必言也人所不知
亦不必知也人所不問亦不必問也莊子曰六合之
外聖人存而不論此乃切要之言孰謂莊子為虛無
異端乎元人趙緣督治稍正邵子之誕而今之俗儒

已交口議之又丘長春世之所謂神仙也其言曰世間之事尚不能究况天外之事乎由是言之則莊子長春乃異端之正論而康節晦翁之言則吾儒之思說矣本朝劉伯溫古甘石洛下之流其言曰天有極乎極之外何物也天無極乎凡有形必有極理也勢也是聖人不能知耳非不言也故天之行聖人以厯紀之天之象聖人以器驗之天之數聖人以筭窮之天之理聖人以易究之天之所闕人無術以知之若

惟此耳今不曰不知而曰不言是何好勝之甚也嗚呼
伯溫此言其確論乎其曰好勝者蓋指宋儒之論天者
予嘗言東坡詩不識廬山真面目只緣身在此山中
蓋虛於物之外方見物之真也吾人固不出天地之
大何以知天地之真實歟且聖賢之學切問近思亦
何必天外之事耶

天地東西南北溫涼寒暑

帝曰天不足西北左寒而右涼地不滿東南右熱而

左溫其故何也岐伯曰陰陽之氣高下之理太少之異也東南方陽也陽者其精降於下故右熱而左溫西北方陰也陰者其精升於上故左寒而右涼是以地有高下氣有溫涼寒涼者脹下之溫熱者瘡汗之下之則脹

已汗之則瘡已此腠理開閉之常太少之異耳

援西北與東南

言其大也夫以氣候驗之中原地形所居者悉以居高則寒處下則熱試觀之高山多雪平川多雨高山多寒平川多熱可徵矣中華之地凡有高下之大者東西南北各三分也其一者自漢蜀江南至海也二者自漢江北至遼平縣三者自遼平北山北至蕃界北海也故南方大熱中分寒熱兼半北方大寒南北

分外寒熱尤極大熱之分其寒微大寒之分其熱微
然其登步極高山頂則南面北而寒熱懸殊榮枯倍
異也又東西高下之列亦三矣其一者自沂源縣西
至沙州二者自開封縣西至沂源縣三者自開封縣
東至滄海也故東分大溫中分溫涼兼半西分大涼
大溫之分其寒五分之二大涼之分其熱五分之二
溫涼分大溫涼尤極變為大寒大暄也約其大凡如
此然九分之地寒極于東北熱極于西南九分之地
其中有高下不同地高處則寒下處則燥此一分之
中小異也若大而言之是則高下之有一也何者中
原地形西北高北高東下南下今百川滿濤東之滄海
則東西南北高下可知一為地形高下故寒熱不同
二則陰陽之氣有少有多故表溫涼之異爾今以氣
候驗之乃春氣西行秋氣東行冬氣南行夏氣北行
以中分校之自開封至沂源氣候正與歷候同以東
行校之自開封至沂源每一百里秋氣至晚一日春

欽定四庫全書

卷二十八

氣發早一日西行校之自沂源縣西至蕃界磧石其以南向及北東南者每四十里春氣發晚一日秋氣至早一日北向及東北西南者每一十五里春氣發晚一日秋氣至早一日南行校之川行有北向及東北西南者每五百里新校正云按別本作十五里陽氣行晚一日陰氣行早一日南向及東南西北川地每一十五里熱氣至早一日寒氣至晚一日廣平之川行有南向及東南西北者每二十五里陽氣行晚一日陰氣行早一日北向及東北西南川每一十五里寒氣至早一日熱氣至晚一日廣平之地則每二十里熱氣行晚一日寒氣至早一日大率如此然高處峻處冬氣常在半處下處夏氣常在觀其雪零草茂則可知矣然地土固有弓形川蛇形川月形川地勢不同生殺榮枯地同而天異凡此之類有離向丙向巽向乙向震向處則春氣早至秋氣晚至早晚

較十五里有丁向坤向庚向兌向辛向乾向坎向艮
向處則秋氣早至春氣晚至早晚亦較二十日是所
謂帶山之地也審觀向背氣候可知寒涼之地腠理
開少而閉多閉多則陽氣不散故適涼寒腹必脹也
溫熱之地腠理開多而閉少開多則陽氣散故往濕
氣之地皮必瘡也下之則中氣不餘故脹已汗之則
陽氣外泄
故瘡愈

天地運旋變化

天體東南西北經緯三十五萬七千里每一方距八
萬九千二百五十里自地至上八萬里以日照陽城
之半為中乃天體正圓也以古法筭之南極七十二

度隱而不見謂之下規北極七十二度見而不隱謂之上規每度比人間二千九百三十里七十一步二尺七寸四分總而算之每度皆三千里自下度之每度如日輪之大三百六十五周絡四方以行七政雖位分四方體無定常旦暮視中星以知方所其體健而不息其行如璧周旋自東運至南自南運至西自西運而北自北運而出東推行以序漸積寒暑以成歲功二儀隨以出沒五緯隨以伏留列舍隨以隱

見七政非不行也天行速而七政行緩如負戴以周
運也夫天一氣也氣分東南為陽而日隨陽升于東
南氣分西北為陰而日隨陰入于西北蓋東南陽氣
盛于自然故日出于東方陽谷熾于南方明都而顯
麗於正晝西北陰氣盛于自然故日入于西方昧谷
藏於北方幽都而晦伏于半夜炎夏天道南行陽盛
之方日出寅入戌以陽盛于陰日影隨長窮冬天道
行北陰盛之方日出辰入申以陰盛于陽日影隨短

春秋行于正中日出卯入酉而影隨停且南為明都
天體所見日月五星至是明顯北為幽都天體所藏
日月五星入是隱晦兩都各異天體一也日月五星
入幽都陰氣之極所以不明非天入於地也若天入
地則地中為日月所照而明何得名地為幽都壤歟
雨出天氣霜雪肅寒皆自天降蓋天體陽而其用陰
也雲出地氣風煙蒸鬱皆自地出蓋地道陰而其用
陽也天不足於西北則陽弱而陰盛西北之化常多

風寒地厚天低日氣易及乃生其和以成萬物地不足於東南則陰弱而陽盛東南之化常多炎熱江南陂湖水泉所聚四五月時陽氣上蒸其水脈時復為雨化為寒熱方得其中乃成萬物且春首三陽上出天地氣相交通近水則陽蒸水氣以成煙霧近鹵則陽蒸鹵氣以成雲靄近山則陽蒸山氣以成昏霾昏籠日蔽天春夏則東南氣如煙火秋冬則西北氣如暝此天道化令之常皆無關於休咎也

天地只是陰陽二氣

程子曰天地一氣而已分陰分陽便是兩物

張子曰氣塊然太虛升降飛揚未嘗止息虛實動靜之機陰陽剛柔之始浮而上者陽之清降而下者陰之濁其感遇聚散結為風雨為雪霜山川之融結糟粕煨燼無非教也游氣紛擾合而成質者生人物之萬殊其陰陽兩端循環不已者立天地之大義 又曰造物所成無一物相肖者以是知萬物雖多其實

無一物無陰陽者以是知天地變化二端而已又曰
兩不立則一不可見則兩之用息 人曰一故神兩
故化兩者陰陽消長進退

邵子曰陰以陽為體陽以陰為體 又曰氣自子至
午為升自午至子為降子至寅地中升于地上卯至
巳地中升于天中午至申天中降于地上酉至亥地
上降于地中

朱子曰太極分開只是兩個陰陽都括盡天下事物

易不離陰陽千變萬化只是兩個陰氣流行則為陽陽氣凝聚則為陰只這一氣消長進退做出古今天地間無限底事來

唐孔氏曰陰陰也陰氣在內與陰陽揚也陽氣在外發揚伏羲見陰陽之數畫一竒以象陽畫一偶以象陰陽一而施陰兩而承本一氣也生則為陽消則為陰二者一而已陽來則生陽去則死萬物生死主乎陽則歸之于一也蓋天地是劈初陰陽之氣結成立

其大者以為之主便是個胚樸子然後為父為母生
人生物千變萬化皆不出此所以克塞宇宙何莫非
陰陽之氣都那兩個物事不得造化之初以氣造形
故陰陽生天地以形寓氣故天地轉陰陽漢董仲舒
始推出陰陽為儒者宗是故儒者知陰陽則知天地
而萬事萬物無餘奧矣

天地所以為天地論

虛谷問云有天然後有地有天地然後有五行地固

不能敵天之大水亦不當過地之多以意推之天形
之內皆氣也地體浮于天氣之中天氣貫于地體之
中海至深至濶猶有地以為之底流至于無地之處
則無底而天下之水皆入於天地之氣日一夜一晝
行地一次所以助天之氣涸其水以歸于無似勝乎
沃焦尾閭之說魯齋答云子兒時侍東里葉公知天
者也問乘槎之事謂水從海逆入天河循環天地中
只是許多水往往來來不然水溢無去處則天下浸

殺公笑而不答有客從傍代對謂海有沃焦石水至一吸而乾有尾閭穴水至一洩而盡愚曰吸與洩有限而水無窮終不之信及閱隋志謂陽精炎職入水則竭百川歸注足以相補故旱不減而浸不溢此說固善又遺了氣而說未瑩今先生不取沃焦尾閭而取日衆蹟俱醒真名言也然愚猶又即水與氣之說以求印證焉葛洪釋天曰地居天內天大而地小表裏有水天地各乘氣而浮此以水與氣並言也何承

天曰天形正圓而水居其半地中高外卑水周其下
日東出暘谷西入濛汜亦曰咸池四方皆水故云四
海此專以水言也虞聳曰天形穹窿如雞子幕其際
周接四海之表浮于元氣之上譬如覆奩于水而奩
不沒氣充其中也邵子曰其形也有涯其氣也無涯
程叔子曰有氣莫非天岐伯對黃帝問曰大氣舉之
皆以氣言者也愚謂言水不言氣水從何生言水與
氣而不言日二者何從消長合而論之水也氣也日

也三者相與循環於無窮此天地之所以為天地也
諸儒論天地總說

或問天地之形邵子依附之說是矣朱子之說何如
朱子說天地間只有陰陽二氣只一箇磨來運去磨
得急了拶得許多渣滓在裏面無出處便結成地在
中央氣之清者便為天為日月為星辰又說天初生
想只是水火二者水之滓脚便成地今登高而望羣
山皆為波浪之狀只不知因甚麼時凝了初間極軟

後來方凝得硬又說五峰所謂一氣大息震蕩無垠
海宇變動山勃川湮人物消盡舊跡大滅是謂洪荒
之世嘗見高山有螺蚌殼或生石中此石即舊日之
生螺蚌即水中之物下者却變而為高柔即變為剛
此數條通說錯了以朱子前說恰似天纔初生這一
番至五峰螺蚌之說猶可笑也鴻荒之世至宋不知
幾千萬年矣尚有螺蚌哉此朱子篤信之過也殊不知
知天地乃無始無終者也止有一明一暗耳明了又

暗暗了又明所謂萬古者一日之氣象是也到得暗時雖然昏黑不曾墜敗就似人間睡着一般其氣尚流通人睡着之時人雖不知然氣息一呼一吸未有一息之停是以知天地雖昏黑其呼吸未嘗停也月何為昏黑也為無陽也蓋天地到了戌亥純是一團陰氣通是此陰氣煙霧塞了日通無光然雖昏黑天地之形質未嘗敗壞春華秋實之草木並凡有血氣者皆不生了至陽生天依舊開了以天屬陽故也天

雖開然陽尚微至寅之時三陽開泰天地交構所以
依然春華秋實生起血氣之物來

天地總占

惟天為大惟君最尊政教兆於人理祥變見於天文
行有玷缺則日象顯示天有妖孽則德宜日新確乎
在上而晶明者天之體也隕乎在下而安靜者地之
形也地土忽陷萬民離散天色忽變兵戈來侵天裂
是謂陽不足君弱政亂而土裂地震是謂陰有餘臣

專民擾而兵興地鳴有聲天子失國政天鳴有聲至
尊有憂驚天雨草綠信衰所致地生毛人勞兵起之
微地成泉大水而兵亂天雨石大戰而君凶天陰晦
而不雨者內亂陰謀圖議地圻裂而有聲者大兵失
土不寧山鳴乃有大亂天鼓乃有暴兵地燃乃專恣
自災之害天火乃虛偽侈靡之戒民無祿而祿不肖則
天雨以土靈賢滅而用小人則地生乎光怪下人將
起也踊土如山貴臣將死也木冰而介雨雹雨霰四

裔侮而臣后專山徙山崩社稷亡而君道壞雨羽則
人相殘食雨毛則兵徭不息雨金鐵殘酷之由雨蝨
螟貪苛之致雨血則君不親於民雨肉則天不享其
德有暴政則天威成灰多陰謀則天雨成墨雨釜甑
歲穰之徵降爵錫易王之異雨物則其野大兵雨水
則其分大疫無雲而雨者封拜無功不時而雨者賊
臣將起霜雪之降苟非其時政在大臣而不在辟

天文地理合論

嘗聞之易大傳曰天尊地卑乾坤定矣夫以尊卑定
乾坤言乎其位之莫同也而又曰天地絪縕萬物化
生乾道成男坤道成女乃謂其原于乾坤焉既又曰
在天成象正也成形變化見矣言乎其象之莫一也
而又曰易簡而天下之理得而成位乎其中矣又謂
其合德乎乾坤焉何哉噫吾知之矣天地之間一氣
而已而位不與焉一理而已而象不與焉蓋相感者
此氣也而相孚者亦此氣也始生者此理也而終合

者亦此理也知大易之旨而後可以論於理氣之精
達於三才之奧矣今夫天有二極星官有是言也其
言曰南極入地下三十六度常隱不見北極出地上
三十六度常見不隱彼何以知其出入隱見哉以渾
儀之象知之也儀渾之制昉見伏羲而北極之高下
日景之短長星間之廣狹南北東西之方隅咸於是
乎取象焉斯其為制也遠矣地有兩界唐志有是言
也其言曰自三危至朝鮮為北界以限外裔自岷山

至甌閩為南界以限蠻夷彼何以知其南北界限哉
以江河之會知之也江河之原論自僧一行北晉雍
州達為濟瀆謂之胡門南首梁州達于荆揚謂之越
門皆有所考而準焉斯其于術也精矣夫二極兩界
若是乎其高且下也然星土九州之屬見于保章氏
所載者鄭康成謂其有相係之義焉山川列宿之驗
見于法象志所配者李淳風謂其有相應之機焉清
寧奠位一氣相承而何有于高下為哉中國居于二

極南界之中又若是乎其大且小也然中州清淑之
氣降於山川固不特如嵩高所云也真精不雜之神
稟於陰陽又不特如載記所論也符樞在我司命出
焉而何有于大小為哉夫高下遠邇者位也而位屬
方隅幾微相感者氣也而氣通冥極君子不取其位
之相懸而惟取其氣之相協於是而推步考測有宣
夜周髀渾天之三家焉分星布位有歲星主祀纏次
之三說焉司天有考則王朴發斂四篇歐陽所取以

附之史者是也指掌有圖則蘇軾聚古今列國可見者為圖後儒間取之以晉于經者是也是數子也觀象制歷則渾天為幾分節論道則王朴為近其他見亦不過蠡測之知耳而亦惡能盡夫明白顯易之天耶陰陽之三合吾知其本于天而化于陰陽也洪水之降洞吾知其水退而高者為墳下者為窞也西北多山故謂天極之加東南多水故謂地維之折水勢盡而沃焦尾閭之消爍則曰東流所以不溢也鷄火

加諸午位日月五星隨天而轉則曰天地三光之所
以合而順軌也之數義也荒誕怪漫則離騷之天問
雖不經而據理消詳則朱子之註釋為有見其他諸
問固皆齊諧之所志者也而亦何所窺于杳冥莫測
之精乎夫小大方圓者象也而象屬有形乎合潛通
者理也而理入無朕聖人不泥其象之相違而取其
理之相洽于是而考星宿之行列焉使夫二千五百
之可見者皆得以順其軌而左旋也循日月五星之

常道焉使夫遵黃道而歷天階者皆得以受事于太
微也起于天稷沒于析木此雲漢之升沉也吾識之
而分野可定矣繞地左旋一日一周此周天之運行
也吾稽之而七政可齊矣噫銅渾轉象玉表求中久
矣夫天道之難測也而聖人直以此心之理自然之
數知之則失範圍之德其真有以植夫天之維乎弼
成五服則侯甸綏要荒之所由分區別華夷則覲象
寄譯之所由設而王制職方之訓其舉乎審方以官

人故百職不曠任土以作貢故九賦惟供而周官禹
貢之制其舉乎守國莫先於封建也則裂天下之土
以封天下之賢興利莫要于井田也則審百物之宜
以成四方之利疆域明而樹畜育矣取諸月令以協
時序之中本諸王道以臻遠邇之化經緯明而萬方
朝矣噫玄圭錫命玉版獻王久矣夫地道之難奠也
而聖人直以所性之理當然之道行之然則裁成之
教其真有以肇天地之紀乎大抵天地設位則聖人

成能人極之功固本于二儀之奠而參贊之妙又豈出於謀猷政事之外哉易曰仰以觀于天文俯以察于地理是故知幽明之故鬼神之情狀此聖人知天之智窮理之事非天下之至精其孰能與於此

星野合論

今夫天氣也而成文地形也而有理形不得不散而為氣氣不得不聚而成形星辰者地之精氣上發于天者也天有三垣旁列四隅天中極星崑崙之墟也

天門明堂太山之精也岼岐雷晉太嶽砥柱東方之宿也而蒼龍奠位於左矣太行常山碣石朱圉北方之宿也而玄武奠位於後矣鳥鼠太華熊耳桐栢西方之宿也而白虎奠位於右矣荆山大別岷衡九江南方之宿也而朱雀奠位於前矣星官之書自黃帝始嗣是而欽若天象者代不乏人顧金繩玉策之書不可得而窺也所可傳者天有十二次而日月躔焉地有十二野而郊圻畫焉自今觀之雍主魁冀主樞

青兗主機而揚徐荆梁豫莫不有主焉此繫之北斗者也歲星主齊吳熒惑主楚越辰星主燕趙代而鎮而金亦莫不有主焉此繫之五星者也角亢壽星鄭也氐房心大火宋也尾箕析木燕也斗牛星紀吳越也女虛危玄枵齊也室璧娥訾衛也奎婁降婁魯也胃昂畢大梁趙也觜參實沈晉也井鬼鶉晉秦也柳星張鶉火周也翼軫鶉尾楚也此繫之二十八宿者也星有七州有九兗青徐揚并屬二州此七星所以

主九州而七國亦在其中矣然方隅躔次東西南北
每每相背者則賈公彥謂古者受封之月歲星所在
之辰其國屬焉似也然有封國自有分星非因封國
而始有虞夏秦漢郡國廢置有前後狹廣之不齊則
歲之所在不可執泥以為常晉屬實沈者高辛之子
主祀參星宋屬大火者閼伯之墟主辰似也然齊屬
玄枵逢公託食既非所主之國而吳越同次燕陳共
分又非所祀之專則主祀之說亦未敢以為然矣善

乎唐一行有言星土以精氣相屬而不係乎方隅其
占以山河為限而不係乎州國庶幾為可近焉故地
有水火木金土之形天有水火木金土之星一形一
象交而精氣自屬非如地在北而分星之在天者亦
居北地在南而分星之在天者亦居南也同一中星
也一則取義之不同蓋星適昏中則以星言如星虛
星昴是也星不當中則以次言如尾火是也次不當
中而適界乎兩次之間則以象言如星鳥是也一則

所舉之不同者蓋書言分至之所中月之本也故春
夏舉鳥火秋冬舉虛昴是也月令言昏旦之所見月
之中也故春夏舉弧亢秋冬舉牛壁是也夫天之高
也星辰之遠也觀緯而審機祥者恒推天以合人然
天之理即人之理也因機祥而修德政者當以人而
合天何者民之麗乎土猶星之麗乎天也君之統乎
民猶北極之統乎星也古之聖人有見乎此道之所
在固嘗以經法天矣而猶察昏見之辰知緩急之序

觀鳥中則授民以種稷之時焉觀火中則授民以種
黍之時焉觀虛中則授民以種麥之時焉觀昴中則
授民以伐木之時焉而順五行以理陰陽又剛克柔
克迭用以出治焉始之乎情性之正著之乎事為之
施措之乎悠久之道動之乎氣機之間則天不愛道
地不愛寶河出圖而洛出書矣此豈無自而然哉若
宋有善言而退舍齊無穢德而可穰非無一事之微
終為適然之數未敢以為應天之實也

星度職方合論

周禮馮相保章氏司天察變皆有定職不可易也自是而後各國代有其官而占測之法往往見諸史冊至漢諸家濫觴愈極矣且自星度言之靈憲論曰中外常明者百有二十四可明者三百二十為星二千五百微星之數萬有一千二百五十庶物蠢動咸有繫命而星之變昭焉三垣之外有中星者聖人南面視四時之中以布政者也詳著於尚書鳥火虛昴之

四宿而月令之中星與大統之中星又不同焉觀孔
穎達之疏陳詳道之書可見矣至于經星則二十八
宿之分羅四方而奠其位緯星則太白辰星鎮歲熒
惑之別畫周天以稽其行經則隨天而緯則順度熒
惑者迭見是咎之方尤難豫定者也至若瑞星出于
隋志景星周伯含譽格澤是也而中興志瑞十有二
焉何其多乎或者謂玄保以下悉係妖星是則各窮
所見矣而分野之疑秦漢郡國李唐州縣或係之北

斗或係之二十八宿或係之五星蓋因地制有殊而為星應之迥別耳甚者緯象以迎占移地以合術而吉凶之僭其能一定乎日有中道月有九行或出之司天考或詳之王朴之論或定之王蕃之占蓋因度數不齊而為運行之差異耳甚者疑井寬而鬼狹歲疾而鎮遲而占測之宜其能的據乎世久術湮而象緯之學得其要者蓋亦寡矣自今觀之蓋因其故而推之乎是故中星也察四仲則據堯典之詳而孟季

則本月令之演經星也觀方位則審一定之則而羅
布則驗所繫之星緯星也而順逆休囚旺相徵焉瑞
星也而遲速經歷色象昭焉九道也據黃道以察其
絃而七政不愆分野也據限度以明其地而二十八
宿不亂要而論之各有一定之故繫象環于九道度
數錯于周天吾知黃道大差九道皆定斯其簡明之
法耳故先儒曰不難于視赤道而難于規黃道豈其
然乎能循其故而星變之周旋于外者凌歷薄蝕飛

字順逆雖若不齊隨所值之方察各分之地一推算
焉而往來愆忒之應莫能逃矣又何必稽之玄遠然
後謂之觀天文也哉周禮司徒職方氏掌地制域皆
有成規不可易矣自是而後歷代互有攻伐而經理
之宜每每垂諸編謨至元狩以來土地愈廣矣且自
外國而言其應則曰西盡于闐龜茲東極夫餘挹婁
北窮樓蘭南究瘴海疆域不下數萬餘里置為郡邑
設以關津而地之勢極焉是故朝鮮破于漢高至武

帝開之而立玄菟樂浪之名隋令漢王討之唐令蘇
定方征之至李勣滅其國而暫疑焉雖處置曲盡其
方而叛合不常終至疲中國而無尺寸之利南越之
地漢分儋耳珠崖南海蒼梧合浦鬱林九真日南
等郡而交州刺史領之武德有總管之稱至德建都
護之府至曲承美奪其地而賈亂焉雖防禦各有其
道而繼代不一終至事遠征而無輸服之誠左將之
擊可謂盡制置之法矣卒之夏參來降而增真蕃臨

屯之部豈中華之力果能致之乎亦其敵之相疑成
之耳朱鎬之使可謂得撫安之策矣卒之黎桓肆虐
而來番隅歐越之侵豈朝廷之命不足制之乎亦其
蠻之習詐致之乎又夷地遠而經絡之久得其實者
蓋亦鮮矣盍因其勢而究之乎是故量遠邇之宜守
要害以阨其衝慎邊防以通其使審內外之辨富民
力以固其本蒞中土以納其降或航海也嚴大宗之
禁勿使之知險夷虛實之情而南邕鴨綠牙校不得以

私通或諭蠻也謹貞觀之符勿使之行欺詐異同之術而渤海交州夷使咸懷其至信要而言之各有不易之勢也若事外而忘內虛已以制人吾知衆不可使地不可耕斯其財力俱困耳故先儒者不難于勤遠而難于篤近信其然乎能究其勢而土地之控制于外者廣狹奢儉理亂貧富雖若不齊隨五方之制鑿絕域之圖一酌量焉而緩急輕重之理莫能越矣何必謀之遐徼然後謂之知地理也哉是故天文之

觀觀以故也而莫詳于淳風之渾儀一行之游儀而已矣其他隱樓覆矩鐵極銅匱各有一時之妙而占測之法皆出二子技藝之餘地理之察察以勢也而莫備於商之四方誥令周之王會圖而已矣其他拓邊啓釁事遠勤兵各精一時之業而綏懷之道罕出二代包羅之外由是觀之牽合事應之變徵倖分外之圖皆昔人無益之舉耳而豈所以垂謨後世也哉

圖書編卷二十八

欽定四庫全書

圖書編卷二十九

明 章潢 撰

地道總叙

羲皇俯察地理孔聖下襲水土學羲孔之學而於地
道弗之庸心焉可乎哉輿地廣矣山川之脈絡未易
以周知矣而其大勢則自陰陽開闢天若有意以界
內外而限南北者在分野則然是故自三危積石負

終南地絡之陰抵太華而北逾大河並大行抵恒山
之右循塞垣至於濊貊朝鮮是謂北紀三邊也自岷
山番冢負地絡之陽並商山抵上洛而南逾江漢至
於荆衡循嶺徼至於百粵是謂南紀越門也其間包
有冀兗青徐荆梁豫揚雍畿服畫九州江河分為兩
界其大幹入中國者為南北中三支雖土宇版章在
德不在險也然天險不可升也地險山川丘陵也王
公設險以守其國所以公劉相邠太王遷岐武王宅

鎬成王營洛衛文卜乎楚丘形勝亦古人所必擇而處也歷觀古今輿圖孰有如我明大一統之盛兩都並據南北雄圖而省府州縣翕然其環拱哉然廣谷大川異制民生其間異俗剛柔遲速異齊所以周禮體國經野辨方正位度地居民則壤成賦各隨地勢以為之區畫至如今之邊防海防河運海運尤經世者所宜究心余嘗愧不獲環孔轍躡禹跡以盡其俯察下襲之宜幸圖籍具存亦可以不出戶庭而週知

天下也故為地道編

分野總叙

分野之說蓋以星之在天者而分在地之土也觀周禮大司徒言土宜辨十二土未言所辨何土保章氏言星土辨九州未言所辨何星嘗以天象二十二州之名考之或者春秋戰國時因星土之義而詳其說乎但以列國參差不齊之地而配乎在天一定之星諸家辨其非誠有然者易曰在天成象在地成形雖

以列星象官象民象物且莫不驗也况天地本一氣也謂其無所關焉可乎惟唐僧一行則以天下山川之象存乎兩界而分野一以山川為界不主封國郡邑之名庶乎近之今載二十八宿分應各省地理圖并存古九州分星圖合而觀之無泥乎一定之說則分星分土亦可以得其槩也已

星宿次度分屬天下州郡國邑考

十二次班固取三統歷配十二分野其言最詳又有費直說周易蔡邕月令章句頗有先後魏太史令陳卓更言郡國所入宿度今附而次之

自軫十二度為壽星於辰在辰鄭之分野屬兗州費直

起軫七度蔡邕起軫六度

自氐五度至尾九度為大火於辰在卯宋之分野屬

豫州費直起氐十一度蔡邕起氐九度

自尾十度至斗十一度為析木於辰在寅燕之分野

屬幽州

費直起尾九度
蔡邕起尾四度

自斗十一度至女七度為星紀於辰在丑吳越之分

野屬揚州

費直起斗十度
蔡邕起斗六度

自女八度至危十五度為玄枵於辰在子齊之分野

屬青州

費直起女六度
蔡邕起女二度

自危十六度至奎四度為娵訾於辰在亥衛之分野

屬并州

費直起危十四度
蔡邕起危十度

自奎五度至胃六度為降婁於辰在戌魯之分野屬

徐州

費直起奎六度
蔡邕起奎八度

自胃七度至畢十一度為大梁於辰在酉趙之分野

屬冀州

費直起胃十度
蔡邕起胃一度

自畢十二度至東井十五度為實沈於辰在申魏之

分野屬益州

費直起畢九度
蔡邕起畢六度

自井十六度至柳八度為鶉首於辰在未秦之分野

屬雍州

費直起井十二度
蔡邕起井十度

自柳九度至張十六度為鶉火於辰在午周之分野

屬三河

費直起柳五度
蔡邕起柳三度

自張十七度至軫十一度為鶉尾於辰在巳楚之分

野屬荊州

費直起張十三度
蔡邕起張十二度

又改陳卓范蠡鬼谷先生張良諸葛亮譙周京房張

衡所著州郡躔次并方

角亢氐鄭兗州

東郡八角一度 東平任城山陰入
角六度 泰山八角十二度 濟北

陳留入亢五度 濟陰入
氐一度 東平入氐七度

房心宋豫州

潁川入房一度
沛郡入房四度

汝南入房二度
梁國入房五度

淮南入心一度
楚國入房四度

魯國入心三度

箕尾燕幽州

涼州入箕十度
漁陽入尾三度

上谷入尾一度
右北平入尾七度

河西上郡北地遼東西入尾十度
勃海入箕一度

涿郡入尾十六度
樂浪入箕三度
玄菟入箕六度

廣陽入
箕九度

斗牛女吳越揚

九江入斗一度
豫章入斗十度

廬江入斗六度
丹陽入斗十六度

會稽入牛一度
泗水入女一度

臨淮入牛四度
六安入牛六度
廣陵入牛八度

虛危齊青州

齊國入虛六度
濟南入危一度

北海入虛九度
樂安入危四度

東萊入危九度 平原入危十一度
舊川入危十四度

室壁衛并州

安定入室一度 天水入室八度
隴西入室四度 酒泉入室十一度

張掖入室十四度 武都入壁一度 金城入壁四度
武城入壁六度 燉煌入壁八度

奎婁胃魯徐州

東海入奎一度 瑯琊入奎六度
高密入婁一度 陽城入婁九度

膠東入
胃一度

昴畢趙冀州

魏郡入昴一度 鉅鹿入昴三度
常山入昴五度 廣平入昴七度

中山入昴十度 清河入昴九度 信都入畢三度
趙郡入畢八度 安平入畢四度 河間入畢十度

真定入畢
十三度

甯參魏益州

廣漢入甯一度
蜀郡入參一度

越嵩入甯三度
犍為入參三度

牂牁入參五度
漢中入參九度

巴郡入參八度
益州入參七度

井鬼秦雍州

漢中入井一度
定襄入井八度
鴈門入井十六度
代郡入井二十八度

太原入井二十九度
上黨入鬼二度

柳星張周三河

弘農入柳一度
河東入張一度
河南入星三度
河內入張九度

翼軫楚荊州

南陽入翼六度
江夏入翼十二度
南郡入翼十度
江陵入軫一度

桂陽入軫六度
長沙入軫十六度
武陵入軫十度

國朝列郡分野

北直隸順天府古幽州尾箕分野漢名廣陽宋名燕
山保定府古幽州尾箕分野漢為涿郡河間府
古幽州尾箕分野秦為鉅鹿上谷真定府古冀州
昂畢分野秦為鉅鹿常山順德府古冀州昂分野
廣平府古冀州昂分野秦為邯鄲大名府古冀兗
二州室壁分野商舊都春秋為晉地唐為魏郡周為
天雄軍

南直隸應天府古揚州斗分野漢為丹陽郡吳為建

業 鳳陽府古揚州斗分野古為塗山氏之國戰國

時屬楚秦屬九江郡漢為淮南唐為濠州 蘇州府

古揚州斗分野秦置會稽郡改江都 松江府古揚

州斗分野晉時屬徐州郡名雲間 常州府古揚州

斗分野秦為會稽郡唐為常州 鎮江府古揚州斗

分野秦屬會稽郡晉屬毘陵唐為丹陽郡 揚州府

古揚州斗牛分野秦為九江漢為廣陵 淮安府古

揚州斗牛分野秦為九江漢屬臨淮 廬州府古揚

州斗分野戰國為楚秦為九江郡漢為江國 安慶

府古揚州斗分野戰國屬楚秦屬九江漢屬廬陵

太平府古揚州斗分野戰國屬楚秦屬鄣郡漢為丹

陽郡 寧國府古揚州斗分野戰國屬越後屬楚秦

為鄣郡漢置丹陽郡晉名宣城 池州府古揚州斗

分野先越後楚漢為丹陽 徽州府古揚州斗分野

先越後楚秦為鄣郡漢為丹陽 廣德州古揚州斗

分野戰國屬楚漢為丹陽 和州古揚州斗分野戰

國屬楚秦為九江漢初屬淮南 滁州古揚州斗分

野戰國屬楚秦為九江漢為淮南 徐州古徐州房

心分野春秋為宋地秦置彭城縣項羽都此

山西太原府古冀州參井分野漢置并州唐為河東
道 平陽府古冀州背參分野堯都於此戰國屬韓

後屬趙秦漢皆為河東郡 大同府古冀州昴畢分

野戰國屬趙秦為雲中鴈門代郡 汾州古冀州參

分野春秋屬晉戰國屬趙秦漢皆為太原 遼州古

冀州參井分野春秋屬晉戰國屬韓後屬趙為上黨

沁州古冀州春秋屬晉秦漢皆為上黨 潞州古冀

州參井分野西伯戡黎即此秦置上黨郡唐為潞

州 澤州古冀州滎參分野春秋屬晉戰國屬韓後

屬趙秦漢為上黨

山東濟南府古青州危分野春秋戰國並為齊漢為

濟南郡 兗州府古徐兗二州奎婁分野春秋為魯

國戰國屬楚 東昌府古兗州危室分野春秋為

齊西鄙戰國為魏齊趙三國之境秦漢為東郡青

州府古青州虛危分野太公封於此漢分置北海郡

登州府古青州危分野唐虞時為嵎夷秦為齊郡漢

屬東郡魏析東萊郡萊州府古青州危分野古萊

夷地秦屬齊郡漢析置東萊郡遼東冀青二州舜分

冀東為北幽州即今廣寧以西之地青東北為營州

即今廣寧以東之地箕尾分野戰國屬燕

河南開封府古兗豫二州角亢分野春秋鄭衛陳三

國之境戰國魏於此號為大梁秦為三川漢為陳留

彭德府古冀州室壁分野商河亶甲居相即此春秋

為晉之東陽地戰國為魏之鄴地秦為上黨邯鄲二

郡 衛輝府古冀州室壁分野殷紂所都朝歌之地

秦屬河東郡漢屬河內郡 懷慶府古冀州覃懷之

地室壁分野商為畿內戰國為魏衛鄭三國 河南

府古豫州柳分野成王營洛在此東都於此 南陽

府古豫州張分野本夏禹之國春秋併於楚戰國屬

韓光武起兵春陵更始立於涇水陽在此 汝寧府

古豫州角亢氏分野秦置潁川郡漢置汝南郡東魏

改蔡州

陝西西安府古雍州井鬼分野周為王畿漢為三輔

後改京兆秦漢西晉魏後周隋唐並都於此 鳳翔

府古雍州井鬼分野周為岐周春秋戰國為秦武帝

更名右扶風 漢中府古梁雍二州井鬼翼軫分野

春秋戰國時屬秦與楚漢高祖初為漢王都南鄭即

此漢武分隸益州 平涼府古雍州井鬼分野秦屬
北地郡漢析安定郡 鞏昌府古雍州井鬼分野春
秋為戎羌秦屬隴西郡東漢分立南安郡 臨洮府
古雍州井鬼分野春秋戰國時為羌所居秦漢為隴
西郡隋改金城 慶陽府古雍州井鬼分野春秋時為
義渠戎國秦屬北地郡 延安府古雍州井鬼分野
秦屬上郡漢初屬翟國 寧夏古雍州井鬼分野春
秋羌戎所居秦為上郡漢置朔方郡赫連夏氏都於

此 洮州古雍州井鬼分野秦為諸戎之地後為吐
谷渾所據隋置臨洮郡 岷州古雍州井鬼分野古
西羌地秦為臨洮縣屬隴西郡漢時晉因之 河州
古雍州西羌地秦屬隴西郡漢屬金城隴西二郡
靖虜古雍州西羌地秦屬隴西郡漢屬金城文縣古
梁州井鬼分野春秋戰國時為氐羌地 甘肅古雍
州井鬼分野漢以前為月支國漢武置酒泉武威張
掖等郡

浙江杭州府古揚州井分野春秋屬吳越戰國屬楚
秦為會稽郡東漢屬吳郡隋置杭州改餘杭郡唐復
為杭州 紹興府古揚州井女分野禹會諸侯于此
春秋戰國時為越國秦置會稽郡隋改越州唐改會
稽郡 嚴州府古揚州牛女分野春秋屬吳越戰國
屬楚秦為會稽鄣二郡漢屬會稽丹陽二郡唐為睦
州 金華府古揚州牛女分野春秋為越國秦屬會
稽郡漢為烏傷仍屬會稽唐為婺州改東陽郡 衢

州府古揚州牛女分野春秋為越西鄙秦漢屬會稽郡處州府古揚州斗分野春秋戰國屬越秦為會稽郡漢為東甌台州府古揚州牛女分野春秋戰國時為越地秦屬閩中郡漢屬東甌國温州府古揚州斗牛女分野春秋戰國並屬越秦屬閩中郡漢初為東甌國寧波府古揚州牛女分野夏商周皆為越地湖州府古揚州斗牛女分野古為防風氏之國春秋屬吳越戰國屬楚漢屬江都改會稽丹陽二

郡唐置湖州改吳興郡 嘉興府古揚州斗分野春
秋屬吳越分境秦為會稽郡漢屬吳

江西南昌府古揚州斗分野春秋戰國時為吳越之
交秦屬九江郡漢置豫章郡 饒州府古揚州斗分
野春秋楚東境後屬吳戰國復屬楚秦屬九江郡漢
屬豫章郡 廣信府古揚州斗分野春秋戰國迭為
吳楚之地秦屬九江會稽二郡漢屬豫章郡及會稽
郡 南康府古揚州斗分野春秋為吳楚之地戰國

屬楚秦屬九江郡漢屬豫章郡 九江府古揚州斗

牛分野春秋為吳越地楚秦為九江郡漢分屬豫章

郡 建昌府古揚州斗分野春秋吳南境戰國屬楚

秦屬九江郡漢屬豫章郡 撫州府古揚州斗分野

春秋為吳境後屬越戰國屬楚秦屬九江漢為豫章

郡吳名臨川 臨江府古揚州斗分野春秋屬吳後

屬越戰國屬楚秦為九江漢屬淮南後屬豫章 吉

安府古荆揚二州之域斗分野春秋屬吳戰國屬楚

秦屬九江長沙二郡漢屬豫章郡及長沙國晉為廬陵郡 瑞州府古揚州斗分野春秋屬吳戰國屬楚秦屬九江漢屬豫章唐置靖州 袁州府古揚州斗分野春秋屬吳戰國屬楚秦屬九江漢屬豫章唐置靖州 袁州府古揚州斗分野春秋屬吳戰國屬楚秦屬九江漢為豫章隋名宜春 贛州府古揚州斗分野春秋屬吳越戰國屬楚秦屬九江漢屬豫章因二水名章貢 南安府古揚州斗分野春秋屬越戰國屬楚秦屬九江郡漢為豫章郡隋屬虔州

湖廣武昌府古荊州翼軫分野周屬吳楚秦屬南郡
漢置江夏郡 漢陽府古荊州翼軫分野戰國屬楚
秦屬南郡漢為江夏郡安陸縣三國屬魏後屬吳
襄陽府古荊豫二州翼軫分野春秋屬楚秦為南郡
南陽郡 德安府古荊州翼軫分野雲夢即此地秦
屬南郡漢屬江夏郡劉宋置安陸郡 黃州府古荊
州翼軫分野秦屬南郡漢屬江夏郡 荊州府古荊
州翼軫分野春秋為楚郢都秦置南郡漢改為臨江

郡 岳州府古荊州翼軫分野周以前為三苗地戰
國屬楚秦為長沙郡劉宋復分巴陵等縣 長沙府
古荊州翼軫分野商為荊楚地周始名長沙 寶慶
府古荊州翼軫分野春秋戰國時屬楚秦屬長沙郡
東漢屬零陵郡 衡州府古荊州翼軫分野春秋楚
地秦屬長沙漢初屬桂陽郡吳分為湘東衡陽二郡
常德府 辰州府古荊州翼軫分野本蠻夷之地春
秋屬楚秦屬黔中郡漢為長沙武陵二郡三國為武

陵郡 永州府古荊州翼軫分野春秋戰國為楚南
境秦為長沙郡 沔陽州古荊州翼軫分野春秋戰
國時屬楚秦屬南郡漢為江夏郡 承天府古荊州
翼軫分野春秋戰國時屬楚秦屬南郡漢為江夏郡
宋齊並為竟陵郡 靖州古荊州軫分野秦為黔中
郡漢屬武陵郡武帝時屬牂牁郡唐為溪洞 郴州
古荊州翼軫分野春秋戰國屬楚秦屬長沙項羽徙
義帝於此漢置桂陽郡屬荊州 施州古荊梁二州

翼軫分野春秋為巴國戰國為楚巫郡秦屬黔中郡
漢屬南郡 永順古荊州翼軫分野蠻夷之地春秋
楚國之境秦屬黔中郡漢為武陵郡 保靖古荊
州翼軫分野隋為辰州地唐為漢州地宋置任靖州
四川成都府古梁州井鬼分野入參一度古為蜀國
秦置蜀郡漢武置益州蜀郡隸焉蜀漢都此 保寧
州古梁州井鬼分野春秋為巴國秦置巴郡漢末改
為巴西郡 順慶府古梁州參井分野春秋戰國時

為巴子國秦屬巴郡劉宋析置宕渠郡 叙州府

古梁州井鬼分野古為夔國漢為犍為郡 重慶府

古梁州井鬼分野周時巴子國秦置巴郡蜀王建孟

知祥繼有其地 夔州府古荆梁二州地翼軫分野

秦屬巴郡東漢分置永寧郡改巴東郡 馬湖府古

荆州井鬼分野古夔侯國之地夷獠所居漢武為犍

為牂牁二郡 潼川州古梁州井鬼分野春秋戰國

為蜀地秦為蜀郡漢置廣漢郡屬漢分置梓潼郡隋

改新城郡 眉州古梁州井鬼分野秦為蜀郡漢為

犍為郡 瀘州古梁州井鬼分野春秋戰國為巴國

秦屬巴郡漢為犍為郡 雅州古梁州井鬼分野秦

為嚴道屬蜀郡東川屬南詔烏蒙古梁州井鬼分野

古為竇地甸漢為牂牁郡 烏撒古梁州井鬼分野

芒部古梁州井鬼分野古為屈流大雄甸 播州古

梁州井鬼分野秦為夜郎 蘭江縣漢屬牂牁郡

永寧梁州之南境井鬼分野秦為蜀郡漢為益州

龍州古梁州井鬼分野周秦為氐羗漢為陰平道屬益州 天全六番梁州之南境井鬼分野古西南夷平茶洞古荆豫二州軫分野戰國為黔中地秦屬黔中郡漢屬武陵郡 松潘古梁州觜參分野古氐羗地漢屬蜀郡 四川行都司指揮使司古梁州井鬼分野本西南夷漢武置越嵩郡

福建福州府古揚州牛女分野周為八閩秦置閩中郡漢屬會稽郡唐為泉州改長樂郡 邵武府古揚

州牛女分野周為八閩秦屬閩中郡漢屬會稽郡唐
改屬建州 建寧府古揚州牛女分野周為八閩秦
屬閩中郡漢屬會稽郡唐置建州改建安郡 延平
府古揚州牛女分野周為閩越秦屬閩中郡漢屬會
稽郡唐為建福汀三州 興化府古揚州牛女分野
周為八閩秦屬閩中郡漢屬會稽郡唐置隸豐州後
隸泉州 泉州府古揚州牛女分野周為八閩秦屬
閩中郡漢屬會稽郡唐置武榮州改清源郡 漳州

府古揚州牛女分野周為八閩秦屬閩中郡漢屬會稽郡唐置漳州改漳浦郡 汀州府古揚州牛女分野周為八閩秦屬閩中郡漢屬會稽郡唐置汀州改臨汀郡

廣東廣州府揚州之南境牛女分野春秋為南越地秦置南海郡後趙佗據其地漢武為南海郡 韶州府古揚州牛女分野春秋為百粵地戰國屬楚秦為南海郡漢初屬南越漢武屬桂陽郡 南雄府古雄

州牛女分野戰國屬楚秦屬南郡漢兼屬桂陽郡

惠州府古揚州牛女分野秦為南海郡漢初屬南越

國 潮州府古揚州牛女分野古為閩越地秦屬南

海郡漢初屬南越 肇慶府楊州之南境牛女分野

春秋為百粵地秦為南海郡漢為蒼梧合浦二郡

高州府古越地牛女分野秦為南海郡漢為合浦郡

三國吳置高涼郡 廉州府古南越地翼軫分野秦

為象郡三國吳改珠崖郡 雷州府古百粵地牛女

分野漢為徐聞縣 瓊州府古百越地牛女分野漢

武置珠崖儋耳二郡

廣西桂林府古荊州翼軫分野古粵地戰國為楚秦

為桂林郡漢屬蒼梧鬱林二郡 柳州府古百粵地

翼軫分野秦為桂林郡漢屬桂林鬱林郡 慶遠府

古百粵地翼軫分野秦屬象郡漢為交趾日南二郡

平樂府古荊州翼軫分野古為百越地秦屬桂林郡

漢屬蒼梧郡吳置珠官郡 梧州府古荊州牛女分

野閩為百越地秦屬桂林郡後屬南粵漢置蒼梧郡

潯州府古百越地翼軫分野秦為桂林郡漢屬鬱林

蒼梧二郡 南寧府古揚州西南境翼軫分野周為

百粵地秦為桂林郡漢為鬱林郡 太平府古南粵

地漢屬交趾郡晉以來夷獠居之唐為羈縻州 田

州府古百粵地漢屬交趾郡唐隸邕州 思明府古

百粵地漢屬交趾郡唐置思明州隸邕州 思恩古

百粵地漢屬交趾郡古百粵地唐隸邕州 鎮安府

古百粵地屬交趾 泗城府古百粵地屬交趾 隸

邕州 利州古百粵地漢屬交趾郡宋建利州 秦

議州古百粵地屬交趾 向武州古百粵地漢屬交

趾 都康州古百粵地屬交趾郡 龍州古百粵漢

屬交趾 江州古百粵地漢屬交趾 上林古百粵

地漢屬交趾 安隆古百粵地漢屬交趾

雲南雲南府古梁州界井鬼分野 大理府古梁州界

井鬼分野漢為益州郡 臨安府古梁州井鬼分野漢

屬牂牁郡 楚雄府古梁州界井鬼分野漢為益州

郡 澂江府古梁州界井鬼分野古西南夷 蒙化

府 景東府古柘南也 廣南府宋名特磨道儂智

高之裔君之 廣西府古梁州界古鎮國東南境漢

為益州牂牁郡 鎮元府古西南極邊地唐時南詔

蒙氏為生銀府 永寧府昔名樓頭賤地接吐蕃

順寧府東蒲蠻之地 曲靖古梁州界井鬼分野漢

為益州郡 姚安宋鎮國地漢屬益州郡 鶴慶東

漢為永昌郡唐為越南詔之地 武定古梁州界井
鬼分野古滇國漢屬益州郡 尋甸古滇國地昔爨
刺蠻居此 麗江古梁州界井鬼分野漢為越雋益
州二郡 元吉古西南夷極邊之地忙勝州南詔異
牟尋好開其地 馬龍他郎甸阿瓊諸都蠻台者據
之 瀾滄元為州勝州地 金齒古梁州西南徼外
之地古哀牢國 勝衝漢為永昌郡西境 車里蠻
名車里倭泥貉獐蒲刺黑角諸蠻雜居 木邦舊名

孟都一名孟邦 孟養地名 拘 緬甸古西南夷

八百大甸 老撾俗呼撾自古不通中國 孟定府

舊名景蘇 孟艮府 南甸舊名南宋 干崖 龍

川舊為麓州地以白夷所居 威遠州 灣甸州

蠻名細賤元屬鎮康路 芒布其地舊曰怒謀

貴州貴州宣慰使司荆梁二州之南境參井分野東

西南夷 思州府楚為黔中地漢屬鬱林 鎮遠府

荊州南境舊為豎耶大田溪洞 石阡府荆南裔

銅仁府荊州南裔星分野古為漢蠻地 黎平府荊

州荒裔翼軫之餘夜郎之地 晉安州古梁州界井

鬼分野古夜郎地秦為黔中漢隸牂牁郡 永寧州

古為荒服地 鎮寧州古為荒服地 安順州古為

荒服地

分野分配總說

欽天監十二分野分配州郡與唐天文志稍異貞觀
中淳風撰法象志因漢書十二次度數始以唐之州

縣配而一行以為天下山河之象存乎兩戒北戒自
三危積石負終南北絡之陰東及太華逾河並雷首
底柱王屋太行北抵常山之右乃東循塞垣至穢貊
朝鮮是謂北紀以限匈奴南戒自岷山蟠冢負地絡
之陽東及太華連商山熊耳外方桐柏自上絡南逾
江漢抵武當荆山至于衡陽乃東循嶺徼達東甌閩
中是謂南紀以限蠻夷故星傳謂北戒為三邊南戒
為越門河源自北紀之首循雍州北徼達華陰而與

地絡相會並行而東至太行之曲分而東流與涇渭
濟瀆相表裏謂之北河江源自南紀之首循梁州南
徼華陽而亦與地絡相會並行而東及荆山之衡陽
分而東流漢水淮瀆相為表裏謂之南河故於天象
則弘農分陝為兩河之會五服諸侯在焉自陝而西
為秦涼北紀山河之曲為晉代南紀山河之曲為巴
蜀皆負險用武之國也自陝而東三川中嶽為成周
西距外方大伾北至於濟南至於淮東達鉅野為宋

鄭陳蔡河內及濟水之陽為鄘衛漢東濱淮水之陰
為申隨皆四戰用文之國也北紀之東至北河之北
為邢趙南紀之東至南河之南為荆楚自北河下流
南距岱山為三齊夾右碣石為北燕自南河下流北
距岱山為鄒魯南涉江淮為吳越皆負海之國貨殖
之所阜也自河源循塞垣北東及海為邊徼自江源
循嶺徼南東及海為蠻越觀兩河象與雲漢之所始
終而分野可知矣於易五月一陰生而雲漢潛萌于

天稷之下進及井鉞間得坤維之氣始陰達于地上而雲漢上升始交于列宿七緯之氣通矣東井據百川上流故鷄首為秦蜀墟得兩戒山河之首雲漢達坤維右而漸升而始居列宿上觜觿參伐皆與天關表而在河陰故實沈下流得大梁距河稍遠涉陰亦深故其分野自漳濱卻負恒山居北紀衆山之東南外接髦頭地皆河外陰國也十月陰氣進踰乾維始上達于天雲漢至營室東壁間升氣悉究與內規相

接故自南正達于西正得雲漢升氣為山河上流自
北正達於東正得雲漢降氣為山河下流陬訾在雲
漢升降中居水行正位故其分野當中州河濟間且
王良閣道由紫垣絕漢抵營室上帝離宮也內接成
周皆豕韋分十一月一陽生而雲漢漸降退及艮維
始下接於地至斗建間始復與列舍氣通於易天地
始交泰象也踰析木津陰氣並降進及大辰升陽之
氣究而雲漢沈潛於東正之中故易雷出地曰豫龍

出泉為解皆房心象也星紀得雲漢下流百川歸焉
析木為雲漢末派山河極焉故其分野自河南下流
窮南紀之曲東北負海為析木負海者以其雲漢之
陰也唯陬訾內接紫宮在正畿居河濟間降婁玄枵
與山河首尾相遠隣顛頊之墟故為中州負海之國
也其地當南河之北北河之南界以岱宗至于東海
自鷄首踰河而東曰鷄火得重離正位軒轅之祇在
焉其分野自河會之交東接祝聖之墟北負河南及

漢蓋寒燠之所均也自析木紀天漢而南曰大火得
明堂升氣天市之都在焉其分野自鉅野岱宗西至
東流北負河濟南及淮皆和氣之所布也陽氣自明
堂漸升遠于龍角曰壽星龍角謂之天關於易氣以
陽汰陰夬象也升陽進踰天關得純乾之位故鷄尾
直建巳之月內列太微為天庭其分野自南河以負
海亦純陽地也壽星在天關內故其分野在商亳西
南淮水之陰北連太室之東自陽盛之際亦巽維地

也夫雲漢自坤抵艮為地紀北斗自乾攜巽為天綱
其分野與帝車相直皆五帝墟也究咸池之政而在
乾維內者降婁也故為少昊之墟叶北官之政而在
乾維外者陬訾也故為顓頊之墟成攝提之政而在
巽維內者壽星也故為太昊之墟布太微之政而在
巽維外者鶉尾也故為烈山氏之墟得四海中承太
階之政軒轅也故為有熊氏之墟木金得天地之微
氣其神治於季月水火得天地之章氣其神治於孟

月故章道存乎至微道存乎終皆陰陽變化之際也
若微者沈潛而不及章者高明而過亢皆非上帝之
居也斗杓謂之外庭陽精之所布也斗魁謂之會府
陽精之所復也杓以治外故鶉尾為南方負海之國
魁以治內故陬訾為中州四戰之國其餘列舍在雲
漢之陰者八為負海之國在雲漢之陽者四為四戰
之國降婁玄枵以負東海其神主於岱宗歲星位焉
星紀鶉尾以負南海其神主于衡山癸惑位焉鶉首

實沈以負西海其神主于華山太白位焉大梁析木以負北海其神主于恒山辰星位焉鶉火大火壽星承韋為中州其神主于嵩嶽鎮星位焉近代諸儒言星土者或以州或以國虞夏秦漢郡國廢置不同周之興也王畿千里及其衰也僅得河之七縣今天下一統而直以鶉火為周分則疆場舛矣七國之初天下地形雌韓而雄魏魏地西距高陵盡河東河內北固漳鄴東分梁宋至於汝南韓魏據全鄭之地南盡

潁川南陽西達虢貉距函谷固宜陽北連上地皆綿
亘數州相錯如繡考雲漢山河之象多者或至十餘
宿其後魏徙大梁則西河合于東井秦拔宜陽而上
黨入于鬼方戰國未滅時星家之言屢有明效今則
同在畿甸之中矣而或者猶據漢書地理志推之是
守甘石遺術而不知變通之數也又古之辰次與節
氣相係各據當時歷數與歲差遷徙不同今更以七
宿之中分四象中位自上元之首以度數紀之而著

其分野其州縣雖改隸不同但據山河以分爾晉天文志十二次分野始角亢者以東方蒼龍為首也唐十二次始女虛危者以十二支子為首也以其斗牛為星分之首者日月星起于斗宿古之言天者由斗牛以紀星故曰星紀則星紀為十二次之首而斗牛又二十八舍之首也本朝應運肇基而南京應天府是星紀斗牛之分且與天地人三統之正相協自周以來千年間帝王之運適符於今豈偶然哉

諸星分野附

北一主秦 二主楚 三主梁 四主吳 五主趙

六主燕 七主齊

斗南一主吳 二主會稽 三主丹陽 四主豫章

五主廬江 六主九江

三台上星主兗豫下星主荆揚 中台上星主梁

雍下星主冀州 下台上星主青州下星主徐州

五車一主秦 二主燕趙 三主魯衛 四主楚 五

主魏衛

五星所主 歲星主齊魯東吳青徐揚兗之地 熒惑主荆

楚川南荆州衡陽之地 鎮星主中州三河梁豫之

地 太白主西維秦晉巴蜀梁雍之地 辰星主燕

趙代幽燕之地

垣天市垣下元一宮名天市兩扇垣墻二十二東邊宋與

南海關燕東徐越齊中山九河趙魏次其間西邊韓

楚梁巴蜀周與鄭晉并河間河中直在頭上安

紫微垣垣左樞右樞當門路左畔上少分宰輔上衛少衛

次第分六丞最後成八數西邊少尉起等初輔衛亦分上少無上丞最後對上少七星點點不糊望

十二諸侯十二諸侯次第陳先從越國向東論東西兩周

次二陳秦雍周南雙鴈門代國向西一縉紳韓魏各一皆北輪楚之一國魏西屯楚城南畔趙燕畢燕西北郡是齊鄰

星細區分

十干分野 甲乙海外日月 丙丁江淮海岱 戊己中州

河濟 庚辛華山以西 壬癸常山以北 甲齊乙

東夷 丙楚丁南夷 戊魏己韓 庚秦辛西夷

壬燕趙癸北夷

十二支分野 子周 丑程 寅趙 卯鄭 辰邯鄲 巳衛

午秦 未中山 申齊 酉魯 戌吳越 亥燕代

總論分野

分野視分星古不謂地也地有彼此之不齊而分野

在天則一定而不易以彼此不齊之地必欲求配於
在天十二次整然之分野其說之難通也固宜蓋天
有三垣紫微太微天市是也紫微太微皆將相輔佐
之位而天市下垣則列國星宿之所在其星東南二
十二宋南海燕東海徐吳越齊中山九河趙越韓楚
巴蜀秦周鄭晉河間河中曰分野者指列宿所屬之
分而言也鄭氏所謂星土星所主土是也其國在此
而星則在彼彼此若不相配而其為象未嘗不相屬

非地之在北者其分野在天亦居北地之在南者分野在天亦居南也列國之在天下彼此縱橫之不齊猶犬牙然而欲以其地之不齊者求合乎在天分野之整然彼此之不相配無足怪者甚者至於天之北極為天之首其體反背故有吳北魯東之差其惑甚矣易不云乎在天成象在地成形水火金木土其形在地者也而天有其星焉所謂象也豈惟五星哉凡物莫不皆然矣故夫齊吳燕宋韓楚周秦魏趙諸國

之地地之形也而其星在天象之謂也地有是形則
天有是星有是星則有是名曰齊吳燕宋韓楚周秦
魏趙列國者非後世有是名而舉以為分野之名也
何以知其然也徵諸東海南海九河河間河中巴蜀
中山有以知之也東海南海九河河間河中非國中
山巴蜀非若諸國之顯也故曰地有是形則天有是
星而分野者指列星所屬之分而言也或曰若然則
十二次之說將無所徵曰十二次所以驗天運之度

數日躔之次舍此蓋古法而歷家之所取驗者也因其度數次舍之所在而妖祥見焉則其所屬之地從亦可徵矣抑分野之豈專繫於是哉又按宋葉時禮經會元其辨尤詳茲不能具矣

分野辨

容齋洪氏隨筆曰十二國分野上屬二十八宿其為義多不然前輩固有論之者矣其甚不可曉者莫如晉天文志謂自危至奎為娵訾於辰在亥衛之分野也屬并

州且衛本受封於河內商虛後徙楚丘河內乃冀州所部漢屬司隸其他邑皆其東郡屬兗州於并州了不相干而并州之下所列郡名乃安定天水隴西酒泉張掖諸郡自繫涼州耳又謂自畢至東井為實沈於辰在申魏之分野也屬益州且魏分晉地得河內河東數十縣於益州亦不相干而雍州為秦其下乃列雲中定襄鴈門代太原上黨諸郡蓋又自屬并州耳謬亂如此而出於李淳風之手豈非蔽於天而不知地乎

按吳越南而星紀北齊東而玄枵北衛東而娵訾北魯東而降婁西周中土而柳星南秦西北而井鬼西南觜參西而魏東北角亢東而鄭滎陽昴畢西而趙河朔又曰牛女北而謂之揚州虛危北而謂之青州昴畢西而謂之冀州奎婁西而謂之徐州魏冀州之國而屬於益魯兗州之國而屬於徐然則分野之說若有可疑者但傳訛已久歷代因之而唐一行以山河為限而不主於州國之說後人竟未之講也

九州分星圖



按大司徒只言土宜辨其土不言所辨何次保章只言星土辨九州不言所辨何星又言所封之域皆有分星不言其何分也康成以春秋時十二國分配十二次恐未必然今此圖不指定九州分配某星只按職方氏所言九州東西南北自有定界觀九州地界之所抵則星之所辨亦畧可觀矣

分野之疑何始乎曰二鄭之釋周禮也大司徒曰以
土宜之法辨十有二土之名物康成以為十二土分
野十二邦繫十二次各有所宜保章氏曰以星土辨
九州之地所封封域各有分星司農引春秋傳曰參
為晉星商主大火國語曰歲之所在則我有周之分
野是也康成則曰今其存可言者十二次之分也此
分野之辨所以紛紛而不一歟自時厥後或以十二
州配之或以列郡配之或以山河兩界配之或以七

星主九州

後天文志劉昭

或以七星主七國

晉志

或繫之二十

八宿或繫之五星紛紛異論是以學者多疑焉主分野之是者則曰自柳九度至張十六度為鶉火之次當周之分武王克商歲在鶉火伶州鳩曰歲之所在則我有周之分野則周屬鶉火可知自畢十二度至東井十五度為實沈之次當晉之分晉文即位歲在實沈董固曰實沈之次晉人是居則晉屬實沈可知自張十七度至軫十七度為鶉尾之次當楚之分魯

襄公二十八年歲淫於玄枵而裨竈知楚子之將死
且曰歲棄其次而旅於明年之次以害鳥帑周楚惡
之說者謂帑鳥尾也則楚屬鷄尾可知自氏五度至
尾九度為大火之次當宋之分昭公十七年星見大
辰而梓慎知宋之將火且曰宋大辰之墟鄭祝融之
墟也皆火房也說者謂辰大火也則宋屬大火可知
此則分野之說為不疑矣辨分野之非者則曰吳越
南而星紀北齊東而玄枵北衛東而姬訾北魯東而

降婁西周宅中土而柳星乃位于南以柳星為周可乎秦在西北而井鬼乃在乎西南以井鬼為秦可乎觜參在西魏在東北以觜參為魏可乎角亢東宿鄭在滎陽而屬於角亢可乎昴畢西宿趙居河朔而屬於昴畢可乎又曰牛女北也史記謂之揚州虛危北也史記謂之青州昴畢西也史記謂之冀州奎婁西也史記謂之徐州魏冀州之國也晉則不屬於冀而屬於益魯兗州之國也魯則不屬於兗而屬於徐此

則分野之說為可疑矣然畧分野之說而不信則周

禮不應有星土之辨拘分野之說以為驗則左氏未

免有傳會之誣更以左氏考之無水之災何關于玄

枵星紀而梓慎以為宋鄭之災襄二十八年日食之變何

與于承韋降婁而士元伯以為魯衛之惡昭七年星紀

果同為吳分則吳亦得歲士墨何以謂之越得歲而

吳伐之必受其凶昭二十二年參虛果為晉分則實沈為

星子產何以謂之高辛之子而能為晉侯之崇昭元年

此又左氏之說之不足信也又以史冊觀之四星聚
牛女而晉元王吳四星聚背參而齊祖王魏彗星掃
東井而苻堅亡秦景星見箕尾而慕容德復燕此又
分野之驗而未可以盡畧之也蓋星土分星本不可
以州國拘也且以職方氏言地理必指其東西南北
之所在山鎮川澤之所分民畜穀利之所有獨於天
文之紀如司徒只言十有二土未嘗斥言其所應者
何次保章氏言星土辨九州之地不明言其所辨者

何星是星土分星不可以州國定名亦明矣愚以保章觀之隨其土之所屬應其星之所臨故謂之星土辨九州之地非如鄭氏言十二邦繫十二次也隨其國之所封屬其星之所在故謂之所封封域皆有分星亦非如賈氏言受封之日歲星所在國屬焉夫九州上應星土則三百餘度皆有其驗豈特十二次而已乎封域皆有分星則千八百國皆有所屬豈特十二國而已乎九州之土皆配星九州之國皆有分故

因其星可以辨其州之地因其分可以觀其國之妖
祥保章氏之說如是而已說者何必牽合傳會而定
指後世郡國之名以求配之也昔孔子作春秋日食
隕星之變無所不記豈必皆周魯之分而後言之乎
五星聚東井漢入秦之應也崔浩嘗言其不在十月
司馬公作通鑑乃棄之而不取歐陽志唐天文日食
星孛之變一一紀之而獨不言其事應亦豈拘拘於
分野之說哉大抵周官所辨者欲以觀妖祥爾天子

之所觀者九州也諸侯之所觀者一國也諸侯以一國分星而驗一國天子以九州星土而辨九州諸侯觀一國之妖祥而為一國之備可也天子可以諉之一國分星之所屬而不為之救政序事乎知乎此則可以言星土分星之說矣

諸家分星辨

按分野之說自周禮保章氏以星土辨九州之地所封之域各有分星故後世若范蠡王鬼谷張留侯諸

葛孔明譙周京房張衡諸子並云十二國以當十二次而已漢書始分十二次度數魏太史令陳卓始立郡國所入宿度唐天文志又以山河兩戒分南北分野之說諸家不同大抵十二次者星之土九州者地之土所封之域之星乃歲星之分也歲主農祥后稷憑焉故周人常閱其襍祥以觀善敗其始王也歲次于鶉火以達天龜及其哀也淫于玄枵以害烏帑所觀者在歲之次舍不在其度數之縷析蓋以天體赤

道度多黃道度少兩次相交又非截然彼我之分且天下之九州磬折牙制勢既不同而隨時削益統復不一又可以一度二度限之乎蓋嘗稽之晉文即位歲在實沈故董固曰始受實沈之星實沈之次晉人是居吳伐越歲在星紀故士墨曰越得歲吳伐必受其凶五星聚東井而漢高帝秦聚牛女而晉元主吳聚觜參而齊祖主魏要皆以十二次繫十二國占十二歲星也漢魏分度之說與後世日者之術無異先

儒訾之者若宋葉文康公嘗於分野辨其乖謬嘉定
中知靜江府蔡氏勘者亦嘗辨其荆揚之異乃若分
度之非則未之及自今言之蒼梧以上為楚下為揚
越境土相接若此其密而星紀去鶉尾百四十餘度
如以今桂林楚野入軫十一則已涉壽星為鄭地蓋
度者天之經體兩極相懸所以紀辰曜於一日之差
而非所以語九州郡邑之素定也况自度法既立而
後世之言占者未聞一應則亦奚以度為哉他如春


秋文耀鉤北斗分楚荆則屬衡晉志牛女十六星主
十二國魏西一星則屬楚宋天文志天市垣二十二
星其西垣第二星居韓梁之間曰亦楚星則一次舍
之間即有諸國之通繫長沙附軫東甌附翼南蠻之
星觀於軫轄又豈非類見獨發而不必以度占者乎
夫分土之體亦猶人身苟有痼瘵則四肢百體莫不
震動故患之所及雖鄰國不免於災况其本乎區區
以絲分縷析之數求三才之脗合某雖愚未之信矣

輿地山海全圖叙

嘗聞陸象山先生悟學有云原來只是箇無窮今即
輿地一端言之自中國以達四海固見地之無窮盡
矣然自中國及小西洋道途二萬餘里使地止于茲
謂之有窮盡可也若由小西洋以達大西洋尚隔四
萬里餘矧自大西洋以達極西不知可以里計者又
當何如謂之無窮盡也非歟此圖亦自大西洋以至
廣東其海上程途可以里計者如此故并後小西洋


圖存之以備考云

山 地 輿



海全圖

次定四庫全書



圖書編

四十四

地球圖說

地與海本圓形而全為一球居天球之中誠如雞子黃
在青內有謂地為方者乃語其定而不移之性非語其
形體也天既包地則彼此相應故天有南北二極地亦
有之天分三百六十度地亦同之天中有直道自直道
而南九十度為南道九十度為北道日行直道則晝夜
平行南道則晝短行北道則晝長故天球有直道圈列
于中南北二圈列于南北以為日路之界地球之南北

中三圈亦同焉但天包地外其度廣地處天中其度狹
此其差異者耳地每度廣二百里南至北東至西各七
萬二千里是南北與東西數相等而異南北于東西者
無據也夫地厚二萬二千九百零八里上下四旁皆生
齒所居是渾淪一球原無上下總六合內凡足所佇即
為下凡首所向即上矣此無疑之論其專以身之所居
分上下未然也且予自大西浮海入中國轉南過大浪
山已見南極高三十六度則大浪山與中國豈不相為

對待乎故謂地形圓而週圍皆生齒者信然矣茲以普
天下輿地分五州曰上下亞墨利加曰墨瓦蠟泥加曰
亞細亞者利未亞曰泥邏河其各州之國繁艱難悉大
約皆百以上此圖本宜作圓球以其入冊籍不得不析
圓為平其經緯線畫每十度為一方以分置各國于其
所東西線數自中國起南北線數自福島起也
此圖即太西所畫彼謂皆其所親歷者且謂地象圓
球是或一道也


輿地圓圖考


此二圖即前圖也前圖因赤道其直如繩故總為一圖而五方止列其槩此圖圓形以南北二極分之為二故各國可因地以考其詳蓋天圓地亦圓與舊所記載相反且非足跡所及若未可確信然以理揆之却不相背馳况本天之圓以定日月星宿之行度固時令不爽茲據此圖圓象準地面各方相距近遠以定日晷亦節令時刻不差則其度數皆可槩見參之

先儒謂天如雞子青地如雞子黃理則同也故併錄
之亦可以廣見聞之一端矧戴天履地敢不究心乎
哉

輿地圖上


以赤道北






輿地圖下

以南赤道





問天圓地亦圓子何所據而信之乎曰予信乎理耳
彼地勢平面山崇水低人止見其層積平陂之稍殊
耳茲以吾江右一方水勢觀之自大庾嶺至江州相
去幾二千里設地平如砥則水即四泛不下流矣每
歲春夏間淫雨連日夕降水瀰漫懷山襄陵不旬日
悉流出湖口凡四時順流亦莫不然以其自高趨下
之易易也若一丈止高一二寸則自此處達江口可以
丈尺計之乎大江發源岷山以抵東海其高下可以

里數計之乎又黃河由星宿海流入海口固可類推
則即東海類觀四海卑高懸絕皆可因水以知地也
况昊天三百餘度為地一週知地球每度計二百五
十里北極出地三十六度南極入地三十六度由廣
東以達京師每相距數百里即差一度即此以定日
晷皆不爽時刻則據天圓不可以證地之圓乎故曰
吾惟信乎理而已



南贍部洲者乃四洲之一也海中有須彌盧此云妙
高山出水三百三十六萬里入水亦然日月腰中旋
照四洲此洲在須彌之南其地形三角南狹北廣人
面肖之周二十八萬里大小江河二千五百大國十
六中國五百小國十萬諸國中中印土為最大實當
洲之正中我震旦九州介洲之東北特中國數耳印
土乃天竺之正名北背雪山三垂大海地形南狹如
月上弦州平地廣周九萬里大小七千餘城古有轉

輪王建都于此也震旦地形南廣北狹周二萬七千餘里自古三皇開闢未聞分野至帝嚳始劃九州夏分萬國商曰三千周曰千八百國歷皇王周孔所化聲名文物獨盛焉北印土之北其地尚廣東西俱海南北可二萬里皆頑山磧石物雜居乃上古帝王所羈縻而不臣者如獫狁羌戎匈奴突厥等號族種不一亦有君長統之而獷悍難馴故直以邊野目之中印土至東海邊四萬五千里南西地彷彿此南洲之大較也洲中有大池

周八百里名阿耨達此云無熱居香山南雪山北派分
四河流入大海池東曰恒河遶地流入東南曰信度河
流入西南海西曰縛芻河流入西北海北曰徙多河東
流注東北至烏然國海鹽澤入地潛流抵積石山復湧
出為黃河之源今傳星宿海是也又于岷山湧出為川
江之源今長江一帶是也天下泉流綿綿不絕者悉源
于池之一派潛通耳世傳水皆東流不知印土以西水
皆西流也且儒書所稱四海而論王教所及惟曰東漸

于海是上古聖人豈不知震旦之介在東偏而印土尚有南西北海哉意者秦火之後墳典丘索俱燼不獲見圖經之全耳究竟地形非佛經不足以覈其致矣某禪暇檢閱三藏至統紀中有震旦圖漢西域諸國圖盤師西土五印圖三圖叅合道里畧備但形勢失次覽者茫然于是再探諸經圖洲潭之形勢及考諸師西域等傳列衆國名又採摭洪範等書參倂海中諸國以妥方向然圖所列者亦百分之一耳要之一世界中山之大者

莫若須彌境之大者莫若四洲其餘海島拳石之國
或千里萬里如星羅棋布為人仙神鬼龍獸異類所
居不可勝記其南洲大畧如此按此圖與說出于釋
氏雖不可盡信然覽此亦可以知地勢之無窮盡云

又四大洲名

南閻浮提洲

縱廣七千由旬

東拂于逮洲

縱廣九千由旬

西瞿耶尼洲

縱廣八千由旬

北鬱單越洲

縱廣十千由旬

圖書編卷二十九